



**Majlis Ugama Islam Singapura**

**Khutbah Jumaat**

**24 Jun 2016 / 19 Ramadan 1437**

**Memakmurkan Akhir Ramadan**

الْحَمْدُ لِلَّهِ الَّذِي أَنْزَلَ الْفُرْقَانَ وَ أَيْدِ النَّاسِ بِالْحِكْمَةِ وَ الْبَيَانَ،  
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ شَهِدَ لِنَفْسِهِ  
الْوَحْدَانِيَّةَ وَ الْإِحْسَانَ وَ شَهِدَ بِهِمَا مَلَائِكَتُهُ وَ الثَّقَلَانِ، وَأَشْهَدُ  
أَنَّ سَيِّدَنَا مُحَمَّدًا عَبْدُهُ وَرَسُولُهُ الْمَبْعُوثُ بِالرَّحْمَةِ وَ الرِّضْوَانِ ،  
اللَّهُمَّ صَلِّ عَلَى سَيِّدِنَا مُحَمَّدٍ وَ عَلَى آلِهِ وَصَحْبِهِ وَسَلِّمْ  
تَسْلِيمًا كَثِيرًا. أَمَّا بَعْدُ فَيَا عِبَادَ اللَّهِ اتَّقُوا اللَّهَ حَقَّ تَقَاتِهِ وَلَا  
تَمُوتُنَّ إِلَّا وَأَنْتُمْ مُسْلِمُونَ.

Sidang Jumaat yang dimuliakan

Marilah kita panjatkan kesyukuran kepada Allah s.w.t. atas peluang yang diberi, untuk meraih keberkatan Ramadan. Mudah-mudahan Allah s.w.t. melanjutkan usia kita, dan membantu kita memperkukuh terus ketakwaan dan keimanan di dada. Amin Ya Rabbal 'alamin.

Sidang jemaah yang dimuliakan,

Sesungguhnya seperti baru semalam kita merasakan kerinduan yang amat mendalam untuk menyambut kedatangan bulan

Ramadan. Tiba-tiba pada hari ini, dengan tanpa disedari Ramadan hampir berlalu pergi meninggalkan kita. Sama ada disedari ataupun tidak, kita akan bertemu dengan sepuluh malam terakhir Ramadan tidak lama lagi. Dengan berlalunya hari-hari di bulan mulia ini, ia bererti kita perlu dengan segera dan dengan penuh bersungguhan berusaha untuk meraih peluang pengampunan, dan pembersihan dari dosa-dosa serta kesilapan masa lampau.

Pada sepuluh malam terakhir Ramadan ini, terdapat salah satu malam yang sungguh istimewa, yang disifatkan oleh Allah s.w.t. sebagai malam yang lebih baik daripada seribu bulan, ia dinamakan sebagai Lailatul Qadar. Allah s.w.t. berfirman dalam surah Al-Qadr:

إِنَّا أَنْزَلْنَاهُ فِي لَيْلَةِ الْقَدْرِ ۚ وَمَا أَدْرَاكَ مَا لَيْلَةُ الْقَدْرِ ۚ  
لَيْلَةُ الْقَدْرِ خَيْرٌ مِّنْ أَلْفِ شَهْرٍ ۚ نَزَّلُ الْمَلَائِكَةَ وَالرُّوحَ فِيهَا  
بِإِذْنِ رَبِّهِمْ مِّنْ كُلِّ أَمْرٍ ۚ سَلَامٌ هِيَ حَتَّىٰ مَطْلَعِ الْفَجْرِ ۚ

Maksudnya: “Sesungguhnya Kami telah menurunkannya (Al-Quran) pada malam kemuliaan. Dan tahukah kamu apakah malam kemuliaan itu? Malam Kemuliaan lebih baik dari seribu bulan. Pada malam itu turun malaikat-malaikat dan Jibril dengan izin Tuhannya untuk mengatur segala urusan. Malam itu penuh dengan kesejahteraan sampai terbit fajar.”

Subhanallah! Bayangkan saudaraku, bagaimana hebatnya pahala dan ganjaran kurniaan Allah s.w.t. bagi mereka yang berjaya mendapat malam tersebut. Ternyata amalan pada malam tersebut lebih baik dari 1000 bulan, yakni sekitar 83 tahun. Kita ini saudara, belum pasti umur akan mencapai masa itu. Dosa dan noda kita juga mungkin menggunung tinggi. Oleh itu, janganlah kita lepaskan sebarang peluang untuk mendapatkan pengampunan Allah s.w.t. dan rahmahNya, lebih-lebih lagi di bulan Ramadan yang mulia ini. Nabi s.a.w pernah bersabda:

وَمَنْ قَامَ لَيْلَةَ الْقَدْرِ إِيمَانًا وَاحْتِسَابًا غُفِرَ لَهُ مَا تَقَدَّمَ مِنْ ذَنْبِهِ

Maksudnya: *“Siapa yang mendirikan solat pada malam Lailatul Qadr dalam keadaan beriman dan mengharapkan ganjaran, akan diampunkan dosanya yang telah lalu”*. [Hadith riwayat Imam Al-Bukhari]

Saudaraku,

Sememangnya, masih belum terlambat untuk kita kembali kepada Allah s.w.t. dan memulakan transformasi diri dengan merubah diri kita dahulu, dengan beriltizam agar hari esok lebih baik dari hari ini, dan hari ini lebih baik dari semalam. Jangan sesekali kita putuskan talian perhubungan kita dengan Allah s.w.t.

Bagaimana sibuk sekalipun kita dalam melaksanakan tugas duniawi, perlu kita sedari bahawa apa pun rezeki yang kita raih adalah milik dan anugerah Allah s.w.t kepada kita. Marilah kita berusaha, agar diri kita sentiasa dekat kepada Allah s.w.t. dan Allah s.w.t. juga dekat dengan kita. Ketahuilah bahawa jalan menuju Allah s.w.t. itu lurus dan jelas untuk diharungi. Apabila terdetik di hati kita untuk kembali kepada Allah dan bertaubat kepadaNya, ketahuilah pada saat tersebut, kita sebenarnya sudah memulakan perjalanan untuk mendekatkan diri dengan Allah. Di dalam sebuah hadith Qudsi, Allah s.w.t. berfirman menerusi sabda Rasulullah s.a.w.:

وَإِنْ تَقَرَّبَ إِلَيَّ ذِرَاعًا تَقَرَّبْتُ إِلَيْهِ بَاعًا ، وَإِنْ أَتَانِي يَمْشِي أَتَيْتُهُ هَرْوَلَةً

Yang bermaksud: “*Jika dia (hamba-hamba Allah) mendekat kepadaKu sehasta, Aku mendekat kepadanya sedepa. Jika dia datang kepadaKu dengan berjalan (biasa), maka Aku mendatangnya dengan berjalan cepat.*” [Hadith riwayat Imam Al-Bukhari dan Muslim]

Maka tanamkan niat saudaraku, untuk kita memperbaiki hubungan kita bersama Allah s.w.t. Lebih-lebih lagi dengan ketibaan sepuluh malam terakhir ini. Jangan kita lepaskan peluang keemasan ini untuk mencari malam Lailatul Qadar dengan mempertingkatkan amal ibadah pada sepuluh malam yang terakhir. Malam dikurniakan rahmat dan pengampunan keatas setiap hamba yang berjaya menjumpainya.

Saudara,

Kita tidak tahu sama ada ini mungkin merupakan Ramadan yang terakhir kita di dunia ini. Kita tidak tahu samada kita mahupun keluarga akan dapat bersama melaksanakan ibadah puasa, terawih mahupun solat bersama pada Ramadan akan datang. Oleh itu, sepertimana giatnya kita di dalam membuat persediaan untuk Eidulfitri, giatkanlah lagi keluarga kita untuk sama-sama meraih keistimewaan Lailatul Qadar dan Ramadan. Contohilah kebiasaan Saidina Nabi s.a.w., yang mana Baginda akan mengejutkan ahli keluarganya untuk turut sama beribadah dan mencari malam yang mulia ini. [Hadith Riwayat Imam Al-Bukhari dan Muslim]

Saudaraku,

Disamping kita berusaha untuk mensucikan diri, pastikan juga kita menjadikan Ramadan ini sebagai peluang untuk mensucikan harta kita dengan mengeluarkan zakat, bagi membantu golongan yang susah dan memerlukan. Ingatlah, sesungguhnya harta yang kita miliki ini kurniaan Allah s.w.t., dan Allah telah menetapkan bahawa apabila sesuatu harta itu cukup mencapai haul dengan nisabnya, maka wajib dikeluarkan zakatnya. Ketahuilah, bahawa antara sebab kita mendapat keberkatan dalam rezeki dan harta ialah dengan menunaikan zakat harta.

Marilah kita perkukuhkan jiwa kita dengan keimanan, hati kita dengan ketakwaan, perbanyakkanlah berdoa di hari-hari yang terbaki dari bulan suci ini. Semoga Allah s.w.t. mengurniakan kepada kita peluang pada Ramadan kali ini untuk mensucikan diri kita dan juga harta kita, sehingga membawa ketenangan dan kesejahteraan ke dalam kehidupan kita di dunia dan akhirat. Amin Ya Rabbal Alamin.

Ya Allah, Tuhan pemilik lailatul qadr, kurniakanlah kepada kami sekeluarga ganjaran malam ini. Angkatlah darjat kami dan ahli keluarga kami di sisiMu.

Ya Rahim Ya Lathif, seandainya ini adalah Ramadan terakhir kami, maka janganlah kau keluarkan kami daripadanya kecuali setelah kau sucikan kami daripada segala noda dan dosa. Sekiranya ditakdirkan Ramadan ini kali terakhir kami bersama keluarga kami, maka himpunkanlah kami di dalam syurgaMu nanti.

Ya Halim Ya Adhim, kekalkanlah di dalam diri kami kerinduan bertemuMu dan Ramadan. Jadikanlah kami golongan mereka yang istiqamah di atas kebaikan dan ibadah meskipun setelah Ramadan meninggalkan kami. Hidupkanlah hati-hati kami dengan keimanan sepertimana kami telah menghidupkan malam-malam Ramadan ini. Amin ya Rabbal 'Alamin.

بَارَكَ اللهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ  
الآيَاتِ وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ  
الْعَلِيمُ، أَقُولُ قَوْلِي هَذَا وَأَسْتَغْفِرُ اللهَ الْعَظِيمَ لِي وَلَكُمْ، وَلِسَائِرِ  
الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ فَيَا  
فَوْزَ الْمُسْتَغْفِرِينَ وَيَا نَجَاةَ التَّائِبِينَ.